

**BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
KANTONALNO TUŽILAŠTVO
KANTONA SARAJEVO
Broj: T09 0 KTRZ 0028015 11
Sarajevo, 14.11.2011. godine**

PRITVOR

**KANTONALNOM SUDU U SARAJEVU
-Sudiji za prethodno saslušanje-
S A R A J E V O**

Na osnovu člana 45. stav 2. tačka i), člana 241. i člana 242. stav 1. ZKP-a F BiH, **p o d i ž e m**

O P T U Ź N I C U

Protiv:

R.B. (1953.) iz Sarajeva, nastanjen u Istočnom Sarajevu

Što je:

Za vrijeme rata i oružanog sukoba u Bosni i Hercegovini između Vojske Republike Srpske (VRS) i Armije Bosne i Hercegovine na području Ilidže, u svojstvu pripadnika Ilidžanske brigade VRS, postupao protivno odredbama člana 3. Ženevske konvencije o zaštiti građanskih osoba za vrijeme rata od 12.08.1949. godine i člana 75. stav 2. Dopunskog protokola I uz Ženevske konvencije od 12.08.1949. godine o zaštiti žrtava međunarodnih oružanih sukoba, tako što je

1. Dana 19.05.1992.godine zajedno sa drugim pripadnicima Vojske Republike Srpske na području Ilidže, uniformisan i naoružan zaustavio najavljeni konvoj sa prethodno pribavljenim odobrenjem sukobljenih strana za nesmetan prolazak, a koji je u organizaciji „Dječije ambasade Međaši“ prevezio civile, uglavnom žene i djecu iz Sarajeva, te iz konvoja lično izdvojio nekoliko civila muškaraca koji su bili vozači vozila u konvoju, među kojima I.S., A.K. i H.G., kojeg je legitimisao i tom prilikom mu oduzeo oko 700 DEM, a zatim ga oborio na zemlju i prijetio mu da će ga zaklati, a I.S. je šakama i nogama više puta udarao po cijelom tijelu nakon čega je izdvojenim civilima naredio da uđu u jedan

od kamiona-hladnjaču iz konvoja i zatvorio ih u hladnjaču ovog kamiona ispred kojeg je postavljena straža, a vrata kamiona su po njegovoj naredbi morala sve vrijeme biti zatvorena, pa su se ovi civili zbog nedostatka zraka gušili i gubili svijest, te je nardenog dana zajedno sa NN vojnikom ušao u kamion, kojom prilikom su fizički maltretirali H.G., udarajući ga zajedno šakama i nogama po cijelom tijelu uslijed čega je izgubio svijest, da bi nakon što su skoro tri dana navedena lica bila zatvorena u hladnjači kamiona u krajnje nehumanim uslovima, a za koje vrijeme nisu nikako dobijali hranu, niti su mogli izlaziti vani radi obavljanja fizioloških potreba, iste nezakonito sproveo do Policijske stanice na Ilidži, gdje su zajedno sa drugim zatočenim civilima nesrpske nacionalnosti, bili nezakonito zatvoreni oko dvadesetak dana, za koje vrijeme je R.B. više puta dolazio i maltretirao iste na način što im je naređivao da kroz otvor na vratima ćelije u kojoj su bili zatvoreni, ispruže ruke i kada bi to ovi učinili, snažno bi gurnuo krilo od otvora, te na taj način po rukama udarao zatočenike nanoseći im povrede i veće fizičke boli.

2. Krajem januara ili početkom februara 1993.godine, unifomisan i naoružan došao u naselje Semizovac da bi iz logora „Planjina kuće“ gdje su bili zatočeni civili nesrpske nacionalnosti, izdvojio desetak civila-logoraša, među kojima I.Š., M.B., E.Š., E.D., Z.I. i F.B., te im naredio da uđu u autobus, da bi za vrijeme vožnje iste vrijeđao, tjerao ih da pjevaju srpske nacionalističke pjesme, psovao im i prijetio da će ih ubiti, a u jednom momentu E.Š. stavio pištolj na usta i rekao mu da mora pjevati ove pjesme, da bi nakon što su stigli na Ilidžu, navedenim logorašima naredio da izađu iz autobusa, postrojio ih ispred Šumarske škole, odakle je izdvojio I.Š. i E.Š., a potom ih fizički maltretirao, udarajući ih rukama i nogama više puta u predjelu lica i tijela, nakon čega su svi navedeni logoraši iz autobusa odvedeni i zatočeni u prostorije Vojne policije na Ilidži, gdje su proveli oko mjesec dana, odakle ih je povremeno R.B. nezakonito odvodio na radove, kopanje rovova na prvim linijama razgraničenja sa položajima Armije BiH, kojom prilikom ih je vrijeđao i tjerao da pjevaju srpske nacionalističke pjesme.

Dakle, kršeći pravila Međunarodnog prava za vrijeme rata i oružanog sukoba namjerno nanosio osobama snažni tjelesni i duševni bol, pljačkao imovinu, nečovječno postupao i protivzakonito zatvarao civile.

Čime je počinio krivično djelo Ratni zločin protiv civilnog stanovništva iz člana 173. stav 1. tačke c), e), a sve u vezi sa članom 180. stav 1. Krivičnog zakona Bosne i Hercegovine.